

INTERVENCAO FINAL DA BANCADA FRETILIN NA OCASIAO DA VOTACAO FINAL E GLOBAL DA LEI DO OGE 2019

21 Dezembru 2018

Sr. Presidente Parlamento Nacional, Sr. Primeiro Ministro, e Membros do VIII Governo Constitucional, Distintos Deputados,
Audientes no Rona Nain sira hotu Povu Maubere tomak,

Excelencias,

Husi perspectiva gestão, lolos la iha nasaun ida mak kiak, iha deit mak nasaun ka pais mal gerido. Tidaklah ada negara miskin atau terbelakang, yang ada hanyalah negara salah urus. Nasaun barak mak maski riku, mas tanba falha iha gestão ba nia rekursu, sai fali kiak. Nasaun barak mos maske la iha rekursus consege sobrevive no sai modernu.

Nune'e mak, atu relembra pensamento logiku A verdadeira economia significa gestão racional dos recursos sempre escassos.

De faktu, hanesan ema hotu koalia, Timor--leste nia economia sei iha karater subsistência no dependente kuaze total ba mina rai no gas. Reseitas husi minarai ne'ebe hetan ona, sura hahu'u husi kriasaun Fundu Petroliferu \$21 bilioes, tau hamutuk ho retornu husi investimento besik \$26 bilioes, maibe to'o 2018 ne'e iha deit ona 17.6 bilioes. Ne'e hatudu katak ita nia rekursu husi reseitas minarai nian ne'ebe ita depende ba ne'e, limitadu ka la barak, uitoan deit ona.

Entao, faktu ida ne'e ejiji ita tenke tuir linha de orientasaun politika ida, atu oin sa halo jestaun racional ba reseitas husi minarai, hodi transforma no diversifica economia. Katak tenke uza duni osan husi reseitas minarai nian hodi halo despeza publika no halo investimento iha setores produtivos, atu produz rikeza barak liu tan, hodi nune'e permiti estadu atu aumenta despeza publika no investimentu iha servisus prioritarius, infraestrutura no desenvolvimento no kapasitasaun capital humanu, ke no fim bele garante kresimentu ekonomiku ida saudável, inkluzivu no sustentavel.

Governu sira hotu liuliu sira ne'ebe durante ne'e ukun ho reseitas husi minarai nian, por mais boas intenções na sua base, redondamente falha halo gestão racional ida ne'e. Apezar de gasta ona osan barbarak no halo ona investimento bobot iha área sira hanesan infraestrutura no formasaun capital humanu, maibe tanba falta de efisiensia no efikasias, no la acompanha ho investimento privadu, nune'e maka, maske consege kresimentu ekonomiku doble digit, economia Timor--Leste estatika hela deit ka laiha dinamismu, no economia la kompetitivu, menus produtividade, setor produtivo nafatin estagnadu, balança komersial sei extremamente negativa, reseitas domestikak nem to'o atu selu salariu no vensimentu funsionariu publiku sira, hamosu tan desigualdade, ou melhor assimetria entre capital Dili no restu do paiz, no problema oioin ne'ebe povu kontinua hasoru iha vida loloron konaba be mos, edukasaun, saúde, agricultura, eletrisidade, servisus publikus, administrasaun publika no sst.

Povu Maubere tomak,

Fofoun, ita hanoin VIII Governo Constitucional, Governu ida ne'ebe mai husi Alianca de Mudanca para o Progresso, AMP, ho sira nia promessa ba povu atu halo mudança, no ho sira

nia Programa Governu ne'ebe hetan ona aprovasaun husi Parlamentu ida ne'e, atu halo mudança no fo solusaun ba problema sira ne'ebe temi ona iha leten, hodi transforma no diversifica ekonomia Timor-Leste.

Maibe, infelizmente OGE 2019 ne'ebe sira apresenta mai iha PN ne'e, além de uza nafatin politika fiscal tuan sira uluk--uluk nian, nune'e mos estrutura orsamentu ne'e rasik kontarariu fali hosi sira nia propriu Programa Governu, no la refleto prioridades no objetivu sira ne'ebe sira rasik defini ona.

OGE 2019 ne'ebe foin hetan votasaun final e global dadaun ne'e ho total \$2.1 bilioes, montante ida ke bot tetebes no bot liu dok kompara ho orsamentu estadu tinan ulukuluk nian. Osan montante ida ne'e kuaze foti hotu husi Fundo Petroliferu. Reseitas domestikikas mak \$198 milhoes deit.

Orsamentu atu gasta deit osan, tanba reseitas ne'ebe atu hatama uitoan tebes. Fatia bot husi total orsamentu ne'e, osan mais de \$650 milhoes tau ba atu sosa asoens husi Conoco Philips no Kompania Shell nudar investimento iha seitor petroleo, enkuantu seitor primariu, agricultura menus husi 1% husi total ne'e, turismo hetan uitoan liu tan, edukasaun mais ou menus 3,5%, Saude iha deit 0,8%, Be mos no saneamentu mos uitoan tebes. Osan ba formasaun profesional tun kuaze 50%, nune'e mos Fundo Dezenvolvimento Capital Humanu tun barak los. Kapital Dezenvolvimentu iha deit \$400 e tal milhoes, kiik liu Bens e servisu. Desekilibru ida bot tetebes. Rezultadu no benefisiu saída mak povu atu hetan husi orsamentu ida hanesan ne'e?

Husi orsamentu ida bot ne'e, afinal osan barbarak ne'ebe mai husi Fundu Minarai nian, barak mak tau ba bens servisu no capital menor, áreas sira ne'be la produtivu, ka gasta deit ba konsumu nian, hodi sustenta no habokur deit makina estadu, hodi fo fatin servisu no fo benefisiu ba membro partidu sira iha governu.

Laos novidade, katak iha duni parte sira hanesan bem e servisu no capital menor mak iha risku bot ba inefisiensi no Korupsaun, tanba laiha duni sistema kontrolu ka mekanismu fiskalizaun efikas ba ida ne'e. Ita bele hare lolos iha Bens Servisu por Ezemplu, osan barak tebes mak tau ba Servisu profesionais, viajem estrangeiru, no outros servisu sem dezagregasaun, completamente hanesan saku azul. Durante debate orsamentu, kuaze 70 proposta husi Deputadu sira opozisaun atu koa hetan rejeisaun total husi Governu ne'ebe dala barak mak koalia atu halo poupança no kontra despezas superfulas.

No fundo, Orsamentu 2019 ida ne'e laiha diferença ho orsamentu sira tinan uluk--uluk nian, katak orsamentu despesista, orsamentu atu halo gastus desnecesarius, orsamentu ba improdutividade no inefisiensi. Orsamentu ida ne'e mos kompromete ekonomia, no kompromete sustentabilidade Fundu Petroliferu. Orsamentu ida ne'ebe sei la lori rezultadu no benefisiu masimu ba povu. Ne'e maka sai rajaun principal ba Bankada FRETILIN hodi la fo votu a favor ba orsamentu ne'e, ka vota kontra.

Oin sa mak Governu bele kumpri nia promessa atu garante segurança alimentar no eleva kresimentu ekonomiku ida ho qualidade, inkluzivu no sustentavel, no halao diversifikasaun ekonomika, se investimento muktos iha seitor agricultura ne'ebe kuaze 80 % husi populasaun moris ba? Oin sa mak bele kria 60.000 empregu foun ba Timor oan sira hanesan Governo AMP promete ne'e, se osan capital dezenvolvimentu uitoan, iha deit atu selu projetu on going, tanba kuaze la iha projetu foun? Oin sa mak bele hasae produtividade, hatun kiak

no desigualdade, se osan ba seitor produtivu no ba desenvolvimento capital humanu hanesan saude, edukasaun, be mos no saneamentu, kiik tebes, invés de aumenta maibe hatun fali?

Atu realsa iha ne'e;

Kriasaun RAEOA ZEESM-TL reprezenta vontade Estadu no Lejislador sira Konstituyente nian hanesan ita hare iha Artigu 5 Konstituisaun da Repúblika. Tratamentu mais favoravel ne'ebé Lei Nu. 3/2014 no Dekretu Lei Nu. 5/2015 obedese klauzula Konstitusionál ida ne'e duni.

Lei OGE 2019 no política sira ne'ebé halo diskriminasaun en relasaun ba RAEOA ZEESM-TL ne'e kontra Konstituisaun no kontra Lei sira ne'ebé en vigor. Nune'e Lei OGE ne'e sofre inskonstitucionalidade no ilegalidade. Ne'e mós razaun ida Bankada FRETILIN vota kontra

Sr Presidente,
Sr Primeiro Ministro, Kolega Deputadu sira,
Maluk Timor oan tomak no rona nain sira hotu,

Iha debate generalidade, wainhira deputadu sira husu konaba tanba sa laiha ekilibru iha alokasaun orsamentu ne'e, Sr. Primeiro Ministro hatan hodi dehan ita tenke buka osan, ita tenke investe tanba oportunidade mak ida ne'e. Reforsa tan husi Deputadus proponente ba aumentu verba \$650 milhoes ba atu sosa saham husi Conoco Philips no Shell hodi justifika katak ita tenke investe tanba minarai husi Bayu Undan hotu ona osan husi Fundo Minarai la barak liu no menus dadaun ona.

La iha duvida, katak ita tenke buka osan, ita tenke investe duni. Maibe tanba hakarak buka osan no atu iveste deit iha seitor petróleo, mak haluha tiha, ka hamenus fali investimento iha seitor primariu ne'ebe importante tebes ba diversifikasaun ekonomika, no seitores fundamentais ba desenvolvimento paiz nian em particular dezenvolvimentu capital humanu, ne'e la los, Sr PM, maluk deputadu sira, ho respeito tomak, estratégia ida ne'e la los. Ne'e, karik hanoin sira atu buka osan ho dalan ne'ebe fasil no lalais deit, karik buka atu eskapa husi dezafiu bobot, no taka fali falhansu sira atu dezenvolve economia, iha tempu kotuk.

La los, tanba maneira buka osan ka estratégia halo investimento publiku hanesan ne'e, além de compromete economia, compromete mos saude no edukasaun ke significa compromete geraun ida povu, que no fundo kompromete desenvolvimento rai tomak. Tanba Estadu la hanesan ho kompania privadu sira, gasta barbarak, gasta lalais, investe, reinveste hodi hetan lukru barak liu. Estadu halo investimento publika atu asegura dezenvolvimentu pais nian.

Maluk Deputadu sira, Povu Timor--Leste tomak,

Ita tenke investe duni atu diversifika economia no hatama ka aumenta osan iha ita nia Fundo Soberano, Fundo petrolífero, maibe tenke investe ho didiak, tuir lei no regras Estadu nian. Atu bele investe ho didiak tenke iha estudus viabilidade ida ne'ebe lolos no kredivel, hau repete "lolos no kredivel" para ita bele hatene lolos vantagem iha ne'ebe, no risku mak saída. Nune'e ita labele lao hanesan "karau matan delek", tuir lia liafuan Sr Primeiru Ministru nian. Maibe ita mos tenke considera faktore, hanesan kapasidade individual no koletivu atu halo gestão, segurança no faktore relasionadus sira seluk ne'ebe bele influencia susesu investimento ida ne'e.

Laiha investimento ida mak laiha risku, investimento hotu iha risku atu kiik ka bot. Mesmu iha investimento publiku sempre hasoru risku mak hanesan inefisiensia, esbanjamento no korupsaun, hanesan safda mak ita nia estadu hasoru dadaun ne'e. Satan iha bisnis ho investimento bot tetebes, hetok nia risku bot liu tan, ke ejiji kapasidade no rigor atu halo gestão ba risku sira ne'e.

Se ita koalia vantagem ekonomika mos, presiza hatene katak industria petrolífera ne'e ekonomista sira bolu naran economia de enclave. Nune'e, ita nia analiza konaba efeitu multiplikativu ne'ebe dehan sei kria kampu de trabalho to'o ema 38.000 to'o 60.000 por anu, hamosu duvida seluk mai ba ita. Maibe, no fundo presiza duni Estudus ne'ebe lolos.

Dalabarak ita koalia buat mesak furak deit, hodi halo politika atu fomenta deit ita nia orgulho, hanesan fali investimento ne'e, laiha risku uitoan, pior liu tan tenta atu taka metin informasaun konaba ida ne'e. Ne'e mak la los! Ita tenke ser honestu, tanba ne'e investimento bot!

Povu Timor--Leste no rona nain sira hotu,

FRETILIN la kontra kadoras atu mai Timor-Leste. Hori uluk kedas FRETILIN nia pozisaun klaru, kadoras tenke mai. Agora ita laiha ona duvida katak kadoras sei mai Timor-Leste. Maibe FRETILIN mos la moris iha iluzaun katak investimento bot ida ne'e la akompanhadu ho risku bot ba nasaun, ke bele halo ita monu ba maldisaun minarai nian, no sai vitima ba própria vontade, no bele tau em kauza mos continuidade ita nia desenvolvimentu, ita nia independência no soberania.

Nune'e, FRETILIN hakarak Timor oan hotu atu tetu, atu estuda no compreende risku sira ne'e lolos, antes de ita foti desizaun, atu nune'e hotu-hotu bele assumi bainhira investimento ne'e falha no simu nia konsekuensia tomak.

Nudar obrigaun atu assegura interesse povu no estadu ne'e, mak Bankada FRETILIN koalia hodi koloka duvidas iha durante debate orsamentu ne'e ho kestoens no pergunta oioin, maibe infelizmente la hetan esplikaun lolos no detalhu husi parte Governu, la hatene tanba sa? Governu rasik sei taka buat batrak. Documento sira konaba estudo viabilidade la fo kompletu, la inklui dokumentus essenciais balu konaba estudus ne'ebe Governu Timor-Leste kontrata hodi halo estudus ne'e.

Nudar opozisaun, maske orsamentu ne'e passa ona, Bankada FRETILIN, sei la nonok, sei koalia nafatin assuntu ida, no husu ba Governu atu kompleta informasaun hotu, nune'e mos dokumentu sira seluk, hodi kumpri direito konstitusional opozisaun nian.

FRETILIN hakarak atu hare no tetu didiak assuntu. Hanesan Sekretariu Geral FRETILIN Dr. Mari Alkatiri, iha fulan ida liu ba husu tiha ona atu iha debate ba assuntu ne'e, Bankada FRETILIN ho haraik'an husu ba parte hotu--hotu – Lideres Nacionais, Líderes Partidus Politikus, Sociedade Sivil, Governante no politiku sira iha Parlamentu ne'e duni, atu ho dignidade, ho etika politika no sentidu estadu ne'ebe a'as, tur hamutuk hodi diskuti no halo dialogu franku no abertu, ba assuntu ida ne'e, nudar asuntu interesse nacional, invece de ita idaidak uza fali assuntu ne'e hodi halo kampanha politika no ataka malu.

Agora, Tempo atu tur hamutuk koalía. Ita hein, iha período Natal ne'e, idaidak bele halo reflesaun no halo kontensaun, nune'e ho laran nakloke hare dialogu mak hanesan necessidades ida ba Estadu ida ne'e.

Sr. Presidente,
Sr. Primeiro Ministro no Membro Governo, Caros Deputados,
Maluk Doben, Povu Timor-Leste, Camaradas Biberes e Mauberes,

Tanba ita atu tama dadaun ona ba momentu especial ida, selebrasaun Natal nian, lori Bankada Fretilin iha Parlamento Nasional nia naran, hau hakarak hato'o votu Santo Natal ne'ebe nakonu ho dame no ksolok, ba ita bot sira ho família, no uma kain tomak iha Timor laran no iha Tasi-balun.

Natal mak tempu atu husik ba kotuk saída mak halo, ka lori ita ba tristeza, no buat hotu ne'ebe la diak iha ita nia moris, tanba Natal hanesan moris foun. Mai ita lori tama ba tinan foun 2019, ho apenas lisaun sira ne'ebe ita aprende, no memoria sira ne'ebe halo ita haksolok iha ita nia moris.

Hau iha esperança katak ita hotu sei simu Natal no Tinan foun 2019 nakonu ho sevisu no realizasaun pessoais no profissionais, nakonu ho espiritu foun, no dispozisaun atu enfrenta dezafiu oioin iha konstrusaun Estadu no Nasaun, liu-liu dezafiu ne'ebe ita nia pais hasoru dadaun.

Hau fiar katak espiritu Natal nian sei leno ita hotu nia dalan iha tinan foun ida ne'e, atu servisu maka'as liu tan, atu rona malu, atu halao dialogu, hodi rezolve ita nia diferença hotu-hotu, hodi hametin ita nia unidade atu hasoru dezafiu foun, no defende Povu ho Estadu ida ne'e nia interesse, ba Timor--Leste ida buras liu.

Boas Festas Santo Natal, e Bom Ano ba ita hotu!!! Muito Obrigadu !